

Di Napoli, dil consolo, di 7. Come à referito al vicere et raine la nova di Goricia; li piace, *licet* molti nimichi di la Signoria non habino auto piacer. Et il grano di li è callato.

Noto. Fo divulgato in Rialto, in zerchio, fiorentini andar a dar el vasto a' pisani, et erano adunati assa' zente.

Fu posto, per il serenissimo e tutti di colegio, *excepto* li savij ai ordeni, una decima, numero . . . , al monte nuovo, da esser pagata a la camera d' imprestidi, termene a di 18 di questo, con don 5 per 100, et non si possi perlongar, ma vadi poi con le 30 per 100. Presa.

Fu posto, per li savij, dar a uno canzelier ducati 3 al mexe, et uno cavalier ducati 2, al provedador electo a Vipao e limitatoli il salario. Presa.

Fu posto et leto le opinion di savij di risponder a Trento. Et li savij messeno di elezer do nostri zentilomeni, con cavali 20 et ducati 100 per uno per spexe *etc.*, e vadi *etc.* A l' incontro sier Marco Bolani, sier Antonio Trun, procurator, sier Hironimo Querini, sier Piero Lando, messeno sia commessa questa tratation di trieve a li provedadori nostri sono in veronese, *videlicet* Emo et Griti. Et prima il serenissimo fe' certa relatione, che li oratori di Franza haveano dito in colegio, che scriveriano a Milan mandasse uno suo orator; *etiam* altre parole usate per ditti oratori, ch'è sospetosi. Poi parlò sier Antonio Trun, procurator, per la sua opinion; li rispose il doxe, laudando elezer li do, per non impedir li provedadori di far guerra, et altre raxon, et poi intrò, con li consieri e cai di 40, in la oppinion di savij dil consejo e terra ferma, che metevano di balotar li rectori sono et che vanno, di qualli ne rimangino do, che arano più balote, con pena, et vadi con quella commission li sarà data per questo consejo. Andò le parte: 20 dil Bolani e compagni, 140 dil serenissimo; et questa fu presa. Et rimaseno sier Zacaria Contarini, cavalier, et sier Francesco Foscari, cavalier. Il Contarini accettò subito, il Foscari andò in renga, era cao di X, et si seuscò, dicendo esser mal sanno et non poter cavalchar e convegnir andar a li bagni in veronese, et convien andar per la egritudine di che ha, et a questo bastava sollo sier Zacaria Contarini, laudandolo *etc.*; et che lui havia il scudo in brazo dil consejo di X a refudar. Or fo messo, per tutto il colegio e il serenissimo, atento tal excusatione fata, che sier Zacaria Contarini preditto vadi lui sollo. Ave 48 di no, il resto di si; et fu presa, partirà *immediate*.

Balotadi li rectori sono et che vano; di qual rimangi do, juxta la parte, vadino a Trento.

Sier Bortholamio Minio, podestà di Padoa.

Sier Piero Balbi, capetanio di Padoa.

Refudò † Sier Francesco Foscari, el cavalier, eleto podestà di Padoa.

Sier Francesco di Garzoni, podestà di Verona.

Sier Francesco Bragadim, capetanio di Verona.

Sier Domenego Contarini, eleto capetanio a Verona.

Sier Zuan Paulo Gradenigo, podestà di Brexa.

Sier Marco Dandolo, dotor, cavalier, capetanio di Brexa.

Sier Antonio Zustignan, dotor, podestà di Bergamo.

Sier Zuam Corner, capetanio di Bergamo.

Sier Polo Antonio Miani, podestà di Cremona.

Sier Polo Capelo, el cavalier, capetanio di Cremona.

Sier Alvixe da Mula, eleto podestà di Cremona.

Sier Zacaria Contarini, el cavalier, eleto capetanio di Cremona.

Fu posto, per il serenissimo e tutti di colegio, scriver a Roma, a l' orator, per uno fiol di sier Andrea Malipiero, *quondam* sier Marco, che debbi comparer davanti il papa, et pregar voi dar l' abatia di Bosco, vacata per la morte di domino Marco Contarini, di sier Hironimo, morto; et fo scritto parole con grande efficitia sopra ziò. Et fu presa.

A di 16. La matina fo in colegio l' orator di Franza et Milam, al qual li fo dito la deliberation di eri. Disse aver scritto a Milan, et credeva il gran maistro aria spazà in Franza, in 3 di sarà qui la risposta. *Etiam* vene l' orator yspano et li fo dito, *ut supra*.

Vene uno episcopo di Scotia, vestito di zambeloto paonazo, acompagnato da sier Lorenzo Orio, dotor, sier Marco Gradenigo, dotor, sier Giacomo Moro, sier Mafio Michiel, cataveri, el qual è alozato in Canarejo in cha' Frizier, venuto per andar in Jerusalem, con . . . persone; à de intrada ducati 2000. Et intrato in colegio, sentò a presso il principe, pre-